

vnd von innerhalb hindurch gestossen / durch die mitlern Rädlein / denn wiederumb hinauff geführet / vnd durch die mitleren rädlein hindurch gestossen / so lange bis solch Seil durch alle rädlein hindurch geleitet wird. Als denn sol noch eine dritte rollen zu vnterst des auffgerichteten Bawms hart vnd fest angebunden werden / dieselbe sol drey Rädlein haben / dadurch stecket man die Seiler / vnd lesset solche von starcken Leuten anziehen / welche in drey ordnungen gestellet seind / solche können auff diese weise einen grossen Last geschwind in die höhe auffziehen. Diesen Zug oder Hezeug nennen die Griechen polyspaston, auß der ursach halben / das man gar viel Rädlein in den Scheiben oder Rollen darzu brauche.

Es ist auch dieser Zug sehr gebreuchlich / dieweil es gar schnell vnd geschwind darmit zugehet / auch der ursach halben / das man leichtlich einen jeden Last / auff welche seiten man begeret / richten oder wenden mag. Weiter ist auch zu mercken / das diese vnd dergleichen Machination / nicht allein zum Bawwerck sehr nützlich vnd groß von nöten seind / sondern auch zu anderer vnzehlicher vnd vielfeltiger behendigkeit / als die Schiffe aus vnd ein zu laden / oder was sonst mancherley gelegenheit vnd notdurfft erfordern mag / sehr bequem vnd nützlich ist.

